


津田文庫  
文庫 1  
1521  
14



龍威秘書二集

第七冊目錄

平臺紀畧

國朝藍鼎元

龍威秘書二集七冊目

二

010190607491



欽定四庫全書簡目録

國朝藍鼎元撰平臺紀畧紀康熙辛丑平定臺灣逆寇  
朱一貴始末起是年四月迄雍正元年四月鼎元時  
在其兄總兵官廷珍軍中故見聞最悉

文庫

序

史以紀事垂法戒夫人而知之矣顧史才難得龍門  
扶風而後寥寥數家愈趨愈下宋元之間一望茅葦  
況于稗官野史惡有可觀者哉稗野之文鮮衷乎道  
循訛走僻炫異逞奇求悅市井庸俗人之耳目有道  
君子弗爲也若有識有筆據事直書卽在一郡一邑  
方隅治亂之微皆必以春秋之直道行之雖稗野猶  
正史矣平臺紀畧亦野史之流也康熙六十年臺灣  
土賊朱一貴作亂

王師平之鹿洲山人身在行間目覩風濤戎馬豕突  
鴻哀指揮戡定經歲餘而後返其于全臺形勝事蹟  
及軍中叅贊公檄謀謨具載東征一集讀者自能知  
之繼因當時市井道聽耳食妄言臺事懼訛傳而失  
其真將惑亂他年史氏之聞見此平臺紀畧之書所  
由作也其書以垂戒爲主使守土之官兢兢業業顧  
畏民岩奸頑之輩革面革心共興仁讓是以起亂必  
書長亂必書棄民失地狼狽遁逃必書羣賊得志猖  
獗恣無忌憚必書以明封疆任重稍存玩忽之心必

至決裂潰敗不可收拾如此豈不足爲前篇華一書  
自古作亂逆賊靡不身首橫分史冊昭然愚氓庶幾  
未盡識者卽以目前朱一貴竊踞海邦有地千數百  
里有黨至數十萬妄擬王公拜官封爵充盜賊之志  
願至此極矣曾不旋踵而或磔或梟妻子親屬並受  
誅夷作賊果奚益乎回思守分善良安生樂業何等  
愉快所以灰叛亂之心而作其尊君親上之氣又不  
啻示之標準焉嘉不屈嘉守澎湖臣節也敘調度敘  
戰功敘擒撫予出力也置身局外不以己名雜其內

示公也總論其是非得失疆境關繫施經綸而措之  
治安又善後之良策也使人人皆讀此則在上無玩  
忽之官在下無悖逆之民千秋百載久安長治山人  
之有功世道也豈淺鮮哉山人平素以世道人心爲  
已任所著女學學準公案諸書皆裨風化不苟作少  
時有志欲續明綱目旁求徵信及至

京師見明史館纂述未竣恐不無是非互異之嫌又  
明人子孫有向山人嘵嘵聚訟者是以中輟慨然欲  
修宋史未敢自信先纂唐代名臣爲修史試筆一書  
以質海內今宋史雖未成編而讀斯平臺紀畧亦可  
知其史才之大槩矣紀畧成于

雍正元年風行海內者十載舊板漫漶余爲加評點  
而新之因併敘其事于簡端

雍正十年歲次壬子秋八月同學弟天長王者輔拜  
手題

序

藍子自東寧歸見有市靖臺實錄者喜之甚讀不終  
 篇而啾然起喟然歎也曰嗟乎此有志著述惜未經  
 身歷目覩徒得之道路之傳聞者其地其人其時其  
 事多謬悞且至于此然則史氏之是非其迷于稗官  
 野史之紀載者不乏矣臺灣雄踞海外直關內地東  
 南半壁沿海六七省門戶相道其亂其平非于國家  
 渺無輕重者致亂之由定亂之畧殉難喪節運籌折  
 衝皆將權衡其袞鉞以為千秋之龜鑑言焉而不求

其實習焉而不知其訛鄙人所爲懼也謗劣不才學  
荒識陋東征逾載躬歷行間風濤戎馬磔鼠哀鴻執  
馘獻俘招降殄孽至于采搜窮山綏靖番黎無不目  
擊手揮又或中夜聞警磨盾草檄千里驅馳睇瞻要  
害廢寢食冒風露益亦幾經勞瘁矣無一命之膺當  
贊畫之寄事定歸來滿船明月惟有全臺形勝治亂  
事蹟了了胸中所見所聞視他人較爲切實則平臺  
紀畧之作惡可已也據事直書功無遺漏罪無掩諱  
自謂可見天日質鬼神而或者以列憲稱名爲譏是

猶未知載筆之道者載筆所以傳信非一人一財之  
文天下後世共之而姓名尚不敢筆之書則過失在  
所必諱縱功績可紀亦等之諂語謾詞夫豈其可傳  
耶鄙人愚昧文不足傳平臺大役事在必傳直道平  
心無爲市井訛談所昏惑亦庶乎其可矣若夫鑿前  
車綢未雨施經綸措康乂有治安之責者諒早留心  
不待閱茲編而後得之也

雍正元年癸卯夏五月端午日閩漳藍鼎元玉霖氏  
白題于鹿草廬



平臺紀畧

漳浦藍鼎元玉霖著

天長王者輔近顏訛

朱一貴之亂

大清康熙六十年辛丑夏四月臺灣奸民朱一貴作亂一貴漳之長泰人小名祖游手無藝好結納奸宄為鄉里所嫉于康熙五十二年之臺灣充臺廈道轅役尋被革居母頂草地飼鴨為生其鴨日暮編隊出入愚眈異焉奸匪過者輒歛延烹鴨具饌務盡歡時

承平日久守土恬熙絕不以吏治民生爲意防範疎濶一貴心易之辛丑春鳳山縣令缺臺郡太守王珍攝縣篆委政次子頗踰閑徵收糧稅苛刻以風聞捕治盟畝者數十人違禁入內山伐竹木者百餘人奸匪遂藉爲口實日誣謗官府短長搖惑人心有黃殿者居羅漢門與朱一貴善時謀不逞往來密洽三月李勇吳外鄭定瑞等相率之羅漢門見一貴曰今地方官長但知沉湎樗蒲耳種種不堪兵民瓦解欲舉大事此其時乎一貴曰然我姓朱若以明朝後裔聳

鄉村歸者必衆皆曰可夏四月十有九日巳酉李勇吳外鄭定瑞王玉金陳印等五十二人卽黃殿庄中奉一貴焚表結盟各招黨羽得數百人立賊幟書大元帥朱夜出岡山襲劫塘汛辛亥警報至郡總兵官歐陽凱集將弁議出兵中營游擊劉得紫請行弗許右營游擊周應龍者龐然魁偉素議論風生令以兵四百人殺賊又白道府遣臺灣縣丞馮迪調新港目加留灣肅隴麻豆四社土番隨之前往岡山距府治三十里賊勢未盛疾趨可滅是日細雨霑泥應龍率

兵番行五里。駐半路店。翼日再進十五里。屯角帶圍。賊夜出。檳榔林汛防把總張文學迎戰。敗績。棄烏鎗。簾牌軍械。爲賊所得。應龍隔一溪不能救。賊復掠大湖。殺汛兵飽所欲而去。南路賊首杜君英。于是日遣楊來顏。子京。率其衆百人之。一貴。所稱君英在淡水。檳榔林招集粵東種地傭工客民。與陳福壽。劉國基。議共掠臺灣府庫。又有郭國正。翁義起。草潭戴。穆江。國論起。下埤頭。林曹林。騫林。璉起。新園。王忠起。小琉球。皆願從君英。攻府約朱一貴共事。癸丑未。一貴移。

屯岡山之麓。周應龍兵至小岡山。遇賊與戰。千總陳元把總吳益等奮力掩擊。賊大敗。退走入山。奪袁交友庄屯住。應龍收兵。剗二濫。楊來顏。子京亦回。下淡水。甲寅。周應龍在二濫傳令。兵番殺賊一名。賞銀三兩。殺賊目一名。賞五兩。上番性貪淫。殺良民四人。縱火燔民居。復斃八人。聞者股栗。乙卯。遠近賊黨借兵。番殺掠爲辭。鼓煽沿途庄店。迫脅居民。分授以幟。由是各鄉紛紛響應。監賊旗幟。應龍進剗楠仔坑。得南路營參將苗景龍警報。稱林曹諸賊夜攻新園。奪軍。

器下淡水營汛已陷丙辰周應龍復行十五里宿南路營丁巳官軍遇賊於赤山杜君英朱一貴兩路夾攻戰方亟周應龍以後隊遽退千總陳元戰死把總周應遂被擒吳益重創佯死陳元屍側李碩負傷走周應龍逃歸府治一貴率羣賊大隊隨之君英偕陳福壽劉國基戴穆翁飛虎江國論郭國正楊來顏子京林曹林騫林璉鄭文苑王忠等攻鳳山縣南路營把總林富戰死守備馬定國戰敗自刎死蔡將苗景龍逃匿萬丹港漁寮三日爲穆周林泗所擒獻郭國

正國止令林泗翁義殺之以其頭獻朱一貴郡中聞赤山之敗譁然大震文武各遣家屬宵遁先後駕舟並出鹿耳門士民相率逃竄戊午總兵官歐陽凱遊擊劉得紫率兵千餘人臺協水師副將許雲章兵五百人出劄春牛埔列營以待軍中夜驚鎮兵四散乙未黎明稍集人無戰心臺廈道梁文煊知府王珍同知王禮臺灣知縣吳觀域諸羅知縣朱夔等捐銀一千五百兩躬歷諸營勞軍庚申賊至鎮協將弁鎗炮齊發許雲躍馬當先陷陣水師弁兵決命奮勇陸師

繼進賊大敗。退屯竿津林。把總陳宋見周應遂被縛。牛車力追殺賊。救周應遂回營。而鎮標把總許陸王陞見賊勢浩大。終當復來。徑引去。是時水師左營遊擊游崇功。巡省笨港。聞報以兵還入鹿耳門。遇文武眷舟。嘆曰。官者兵民之望。官眷逃則人心散。大事去矣。登岸赴敵。其璫叩馬請區。處眷屬。崇功厲聲曰。今日。遑知有家哉。麾眾馳春牛埔。五月朔日辛酉。賊眾數萬俱集。劉得紫率守備張成以兵堵截。中路口在半路店迎敵。歐陽凱許雲游崇功率弁兵在春牛埔。

迎敵。杜君英朱一貴合兵衝殺。鎮兵忽內亂。百總楊泰綽號達家勇者先通賊。為內應刺歐陽凱墜馬羣。賊交刃截其首而去。守備胡忠義千總蔣子龍馬總林彥皆死之。汀州鎮標把總石琳帶兵之臺換班亦戰死。海壇把總李信創重已死。有王宋者憐而欲埋之。復蘇乃與皆匿他所。劉得紫聞敗率兵還救。所乘馬為賊砍倒。與守備張成俱被擒。副將許雲衝突血戰殺賊數百人。與遊擊游崇功千總林文煌趙奇奉把總李茂吉奮臂大呼所向披靡。自黎明戰至日中。

矢窮砲盡雲重創遍體。墜馬走。行猶手刃數十賊。勢孤無援。左手被賊砍斷。乃罵曰。生不能殺。盡逆奴。死必來殲滅汝等。賊怒。副雲屍游。崇功單騎殺賊數十人。馬蹶被殺。林文煌趙奇奉俱戰死。李茂吉爲賊所執。至南較場。見戴穆挺立岸然。穆怪其不跪。叱之曰。若兵耶。茂吉曰。官。穆曰。把總微官耳。若壯士降。當以汝爲將軍。茂吉瞋目厲聲罵曰。我 朝廷命官。豈從汝作賊舉。足踢賊案。案翻。奮力斷縛。直前欲奪刀殺賊。賊衆舉刀共斫之。頭腦破裂。尚指賊痛罵如初。氣

絕乃已。官兵旣敗。臺協水師中營遊擊張彥賢右營遊擊王鼎守備萬泰平凌進楊進千把總朱明劉清鄭耀等率兵十餘人戰船四十餘號。聯艚揚航。逃出澎湖鎮。標左營遊擊孫文元奔至鹿耳門。赴海死。右營遊擊周應龍中營把總王丑附商船逃歸。內地直走泉州。把總李碩陳福尹成道標守備王國祥千總許自重皆逃澎湖。臺廈道梁文煊知府王珍同知王禮臺灣知縣吳觀城縣丞馮迪典史王定國諸羅知縣朱夔典史張青遠皆一時相率登舟。慮港內商漁

艇艦為賊所有。盡驅出鹿耳門。齊赴澎湖。先是粵民高永壽在笨港負販為生。有病者于破廟餓且死。永壽活之。一日至南路。遇前所活人。歔歔感泣。引之深山。中設酒殺相待。賊也。與見朱一貴。刀鎗森列。言倡亂謀甚悉。邀永壽入夥。佯許之。乘間逃回。赴南路營告變。弗信。至府。復告之。鎮道鎮道以為狂疾。會審嚴刑。坐妖言惑眾。將論死。從寬責逐。過海遞回原籍。賊平後制府檄粵東喚高永壽至臺尋向口所見賊營故處不可得。令往羅漢門看之。亦不是。再至南路。即婦遍尋上下山谷月餘。乃還。據高永壽昔日如夢如醉想是命當受刑。今遍覓諸山並無其處。亦異事也。

又安平兵竊賣火藥。戴往接濟。事發亦置弗問。又一僧異眼怪飾。周遊街巷。詭稱天帝使告臺民。四月杪有大難。難至惟門設香案。以黃紙為小旗。書帝令二字。插案中可免。及賊至家。如僧言。故官兵見者以為百姓從賊。多慌亂。以及于敗。群賊攻破臺灣府。蓋朔日午刻也。杜君英先入。住總兵官署。朱一貴繼入。居臺廈道署。同開府庫。分掠金銀。復開紅毛樓。樓故紅彝所築。舊名赤嵌城。紅毛酋長居焉。鄭氏以貯火藥軍器。四十年來莫有啓者。賊疑為金銀窖。故發之。得

大小砲位刀鎗硝磺銚鐵鉛彈如山癸亥立朱一貴  
爲僞王通天冠黃袍玉帶皆取之優羣賊擁坐堂上  
呼萬歲僞號永和北路奸民賴池張岳鄭惟晃賴元  
改萬和尚林泰蕭春等亦于是月朔日監棋聚衆越  
三日環攻諸羅縣北路營叅將羅萬倉千總陳徽把  
總鄭高葉旺分門迎敵萬倉當其南出死力拒戰兵  
單無援賊陳碧以竹篙鎗戳其喉顛張岳賴元改揮  
刀殺之萬倉側室蔣氏聞兵敗自縊死陳徽鄭高遯  
入山集鄉民自保乙丑賴池張岳鄭惟晃賴元改將

羅叅將首賚至府獻朱一貴請功一貴見全臺俱陷  
揚揚得意以爲莫已誅也遂倣俳優登高臺鳴鐘伐  
鼓呵唱拜跪大封羣賊以王玉金爲僞國師王君彩  
洪陣爲僞太師杜君英陳福壽李勇吳外翁飛虎陳  
印戴穆鄭定瑞郭國正顏子京楊來黃殿劉國基黃  
日昇江國論王忠林曹薛菊林騫林璉陳正達張看  
賴池賴元改鄭惟晃鄭文苑陳成等爲僞國公張岳  
不受公爵爲僞將軍陳燥蘇天威等爲僞侯張阿山  
卓敬陳國進等爲僞都督蕭斌詹遴爲僞尚書內閣



辨書麻恩林玉爲僞輔駕大將軍其餘僞文職部科  
以下僞武職總官副將以下不計其數以鄭定瑞蘇  
天威同領賊兵三千鎮守鹿耳門是時僞職填街摩  
肩觸額優伶服飾搜括靡遺或戴幘頭衣小袖紗帽  
金冠被甲騎牛或以色綾裹其首方巾朝服炫煌于  
道民間爲之謠曰頭戴明朝帽身穿清朝衣五月稱  
永和六月還康熙蓋童孺婦女皆知其旦暮可滅而  
擒也先是遊擊劉得紫被擒引頸受刃賊素重其名  
弗忍殺得紫曰吾爲

天子命官不可不死但求埋吾帥屍首死瞑目耳賊黃曰  
昇嘉其義聽之收埋畢復禁之學宮朱子祠求死不  
可得賊與言弗應進食弗食七日仍不死士民兵僧  
進粥苦勸皆弗食至是諸生林臯劉化鯉爲言諸賊  
可滅狀當報仇得紫始受民餽食啜粥延命以待大  
師作恢復計矣臺中逃竄各官及避難民人于壬戌  
癸亥兩日咸到澎湖澎湖協將弁倉皇不知所措見羣  
情洶洶而臺中文武俱至也亦各出家屬登舟將渡  
廈門百姓婦女爭舟雜沓聲震海岸右營守備林亮

聞知請協營主將掣回登舟各家屬守澎湖諸將猶  
豫不決亮厲聲曰 朝廷以海外封疆付我等正爲  
緩急倚賴非徒昇平食祿廩營身家已也今鋒刃未  
血而相率委去他日駢首市曹其能免乎丈夫不死  
則已死則死忠義耳請整兵配船守禦要害俟賊至  
決一死戰不捷而亮死公等歸亦未遲皆曰諾願  
死守亮馳出江干徑申主將號令按所佩刀驅官民  
家屬各登岸衆心始固是時水師提督施世標見避  
難民船到廈方知臺變然未意全郡遽陷也賊入府

時文武倉皇潰亂至澎湖喘息稍定乃具文申報丙  
寅報至廈門世標集諸將議曰臺寇猖獗極矣六七  
日間全郡俱陷此殆非小敵也今數百艘逃入內地  
脫有好徒混跡乘虛鼓煽廈島一搖罪可言哉其各  
謹巡防嚴守禦無敢懈怠浙閩總督覺羅滿保聞臺  
陷念廈門爲控制臺灣咽喉閩南沿海根本重地不  
可不親行彈壓以定人心爲進取恢復之計會商巡  
撫呂猶龍綏輯省城糧餉軍需諸務屬焉密疏告變  
且言星馳赴廈狀請

皇上稍寬督責。尅限一月。務必掃除。以隄復。還土疆。復念  
廈門地褊。人衆。車輿旁午。米價易騰。先移檄浙江。廣  
東兩省。運米之廈。令布政使抄木哈督買。延建上游  
之米。運載赴廈。平糶飛咨。促提督施世標。刻期出師。  
檄召南澳總兵官藍廷珍。星赴廈門。面商征臺機務。  
以糧驛道韓奕。總理廈門軍前糧餉。調撥軍需。僱募  
船隻。諸事。偕督標左營叅將王萬化。撫標左營遊擊  
邊士偉。先兼程赴廈。宣諭百姓。使無恐量。調閩省水  
陸各標營將備弁兵。悉由水道赴廈。聽候調遣。庚午

總督覺羅滿保發三山王申。抵泉之塗。嶺連接南澳  
鎮稟函大喜曰。藍總兵所見事事與吾昭合。吾調此  
君平臺得人矣。蓋廷珍聞臺警。條陳出兵事宜。首請  
總督駐廈。就近督師。而滿保已兼程疾趨。三日。澳稟  
適至。又嘉其指畫謨謀。皆洞中窾會。知爲帥必能成  
功。故云爾也。時陰雨連旬。乘竹兜子。從數騎。行泥淖  
中。所過人莫知爲制府者。乙亥至廈門。則提督施世  
標已登舟出港。兩日矣。初。廈島居民聞臺變。倉猝疑  
賊。且長驅澎廈。而漳泉山僻。無賴囂囂。偶語四處有

揭竿嘯聚之謀居郡邑者攜眷屬避深山居鄉村者入郡邑岌岌乎動矣又聞各路徵兵恐所至騷擾米價騰貴市里驚惶及總督至廈從容鎮靜民乃晏然召募丁壯籍游手皆隸軍中伏莽萌芽潛消淨盡所徵各鎮協標營兵多從海船赴廈陸行至者亦處之舟中人給銀米蔬菜有加嚴令肅伍船只許一人登岸買辦所需悉依民價故雖大師雲集而街巷寂然不見兵革未幾所檄移諸路運載米石數萬俱至米價頓平民益歡慶忘亂屈指臺郡可復也臺中羣賊

互爭雄長當內地總督過塗嶺之日正朱一貴杜君英海外吞併之時先是君英入府時欲立其子杜會三爲王衆不服立朱一貴君英故恚甚每事驕蹇掠婦女七人閉營中而一貴出禁淫掠戴穆強娶民間婦女一貴殺之以洪陣私鬻爲劄併殺洪陣君英所掠女有係吳外戚屬者外請釋之不聽怒欲相攻一貴遣楊來林璉往問君英收縛來璉一貴怒密謀李勇郭國正等整兵圍攻杜君英敗之君英與林沙堂筭率粵賊數萬人北走虎尾溪至貓兒千屯劄剽掠

村社半線上下。多被蹂躪。所未至者。惟南崁以北。爾淡水營守備陳策。聞臺郡陷沒。恐賊人將至。督弁兵堅守。招集鄉壯。分佈要害。有奸民苑景文。潛踪入境。欲煽惑番民爲叛。策擒而斬之。遣隊目鄭明蔡武赴廈請救。則總督滿保已先于塗次。移咨巡撫呂猶龍。就省撥兵。賃船從閩安直向淡水。及至廈。復以十艘配兵五百名。令金門守備李燕北路營守備劉錫帶領救淡。鄭明蔡武所坐船遭風飄入澎湖。施世驃復遣澎湖協右營遊擊張賊領兵前往。及鄭明等至廈。則

呂猶龍自省調發援淡之兵船亦至廈。滿保遣千總李都賞令箭帶領。并會諸路官兵。星赴淡水。應援統計前後發往救淡之兵共一千七百餘名。二十有七日。丁亥。南澳總兵官藍廷珍單騎到廈。所部舟師繼至。總督滿保大喜。與定平臺方畧。委令總統征臺水陸大軍。帶領將弁八十餘員。目兵丁壯八千餘名。營哨商艘杉板頭艍仔等船四百餘號。舵工水手四千餘名。曾提督施世驃于澎湖刻期進勦。祭江誓師。滿保躬造海濱。送之。廷珍意氣慷慨。從容謂滿保曰。草

寇不足煩區處其一登彼岸大人可卽奏報蕩平也  
六月朔日辛卯樓船出廈門港翼日至青水溝颶風  
驟起浪高于桅未幾覆溺者數次三軍相顧動色藍  
廷珍親操舟御風飄至銅山戊戌風定發銅山庚子  
到澎湖會提督施世驃分定調遣計先後赴澎從征  
將弁督標右營叅將王萬化陸路提標中營叅將林  
政後營遊擊苑國斗將軍標右營遊擊魏天錫撫標  
左營遊擊邊士偉水師提標右營遊擊王良駿前營  
遊擊林秀後營遊擊許華金門鎮標右營遊擊薄有

成銅山營遊擊鄭耀祖海壇鎮標左營遊擊謝希賢  
閩安鎮標左營遊擊朱文福寧鎮標右營遊擊郭祺  
汀州鎮標左營遊擊王紹緒漳州鎮標左營遊擊齊  
元輔雲霄營遊擊金作礪興化協標右營遊擊胡璟  
原任海壇鎮左營遊擊李祖原任黃巖鎮中營遊擊  
陳允陞澎湖協右營守備林亮海壇鎮右營守備魏  
大猷南澳鎮右營守備呂瑞麟閩安協右營守備洪  
平陸路提標右營守備康陵水師提標左營守備高  
得志泉州城守營守備鄭文祥興化協左營守備劉

永貴同安營守備葉應龍烽火營守備蔡勇漳浦營  
守備蘇明良安平協千總董方及各標營千總胡廣  
等把總蘇榮等俸滿千總林君鄉等共叅遊都守千  
把一百二十餘員。兵丁壯一萬二千餘名。大小船  
六百餘號。舵工水手六千餘名。軍火器械米鹽蔬菜  
一切軍需皆總督滿保自廈整備。靡有欠缺。所用商  
船俱發價僱募。嚮義不受直者。量給外委守備千把  
總銜。劄以鼓勵之。復慮大兵進勦。澎湖單虛。檄召金  
門鎮總兵官黃英統領海壇鎮標右營遊擊李殿臣

羅源營遊擊王良翰福州城守營都司李經世將軍  
標左營守備黃元溥水師提標後營守備何重中。桐  
山營守備閻威長福營守備王晏協同副將羅光乾  
左營遊擊陳國星守備邱延祚等督官兵防守澎湖  
其餘繼至者皆令施世驃藍廷珍軍前從征。先是周  
應龍逃回泉州。爲陸路提督穆廷斌獲送總督軍前  
而施世驃至澎湖亦將臺變逃回將弁張彥賢等十  
餘員押解之。厦總督滿保將按軍法。數人者皆請死  
于敵。冒矢石立功。贖罪許之。令千總游全興管押征

臺至是亦到澎聽調遣則周應龍張彥賢王鼎王國祥萬奏平凌進楊進朱明劉清鄭耀陳福尹成李碩陳奇通等合之牛龍許自重爲臺變逃回十六員是也而澎協右營把總吳良在臺灣修理戰艦臺陷從賊爲賊謀取澎湖領偽劄百張白金五百兩偕其黨十二人至澎施世驃故納之夜使人醉其同行者酒逆謀破露搜得偽劄窮治之遂盡吐賊中情形知賊黨相攻百姓不附藍廷珍言于世驃曰羣盜皆穿窬烏合畏死脅從乖離渙散一攻卽靡但其衆至三千

萬不可勝誅且多殺生靈無益以某愚見止殲巨魁數人餘反側概令自新勿有所問則人人有生之樂無死之心可不血刃平也世驃曰善戒將弁登岸之日無得妄殺賊來降者悉縱還家門戶旗幟書大清良民者卽爲良民惟拒敵者乃斬之癸卯發澎湖以林亮董方爲前鋒令外委洪就洪選等善水者十二人駕小舟同前鋒先行于鹿耳門深港插標記明舟行路徑丙午黎明舟師咸抵鹿耳門外賊日蘇天威率衆據鹿耳門砲臺疊發大砲又以小舟扼險迎敵



前鋒林亮董方以六船冒死直進亦施大砲攻擊遙望砲臺火藥堆積纍纍亮令砲專攻火藥桶中火藥起燔死賊無算賊潰遂入鹿耳門維時海靈助順潮水漲高八尺藍廷珍率王萬化林政等四百餘艘連檣並進林亮董方乘勝掩殺燬賊船把總蘇榮爭先亦同登岸奪取鹿耳門砲臺烽其營壘遊擊林秀溥有成守備魏大猷葉應龍追殺逸賊蘇天威逃入安平鎮城與賊目鄭定瑞列兵迎敵林亮董方奮勇先登復陷賊陣藍廷珍率叅將王萬化林政遊擊魏天

錫邊士偉朱文謝希賢鄭耀祖胡璟郭祺王紹緒齊元輔金作礪范國斗李祖陳允陞守備呂瑞麟洪平鄭文祥劉永貴康陵蘇明良等各弁兵繼之賊敗走林亮董方復登安平鎮城豎立大軍旗幟廷珍出示安民益日猶未晡也安平旣得令鄭耀祖王紹緒專守安平城許華守鹿耳門王萬化林政林秀邊士偉康陵蘇明良李祖駐劄鯤身頭列守要害安平百姓

喜

王師至止老幼趨踰爭給軍食少壯者自充鄉兵願導官

軍殺賊是夕。施世驃船到鹿耳門。丁未乘潮入安平。朱一貴遣楊來顏子京、張阿山、翁飛虎率賊衆八千餘人犯安平。林政王、萬化邊士、偉、林秀、王紹緒、鄭耀祖、李祖等各率兵迎敵。千總游全興以張彥賢等十四員同在四鯤身與戰。藍廷珍指揮攻擊我兵鎗砲連環如雨。復遣朱文、魏天錫、謝希賢、胡璟、林亮、魏大猷、呂瑞麟、葉應龍、劉永貴等駕小船沿岸夾擊賊。大敗。追至七鯤身瀨口。戊申，魏天錫、謝希賢、魏大猷率把總牛龍外委守備陳章等以輕舟載鎗砲硝磺烈

燭於塗墜埕水仔尾等處。燒賊巨艦凡四。己酉，朱一貴復遣李勇、吳外、張阿山、翁飛虎、陳印、楊來、郭國正等率賊衆數萬人駕牛車列首爲陣。復犯安平。乃以齊元輔、金任、礪、呂瑞麟、蘇明良、范崇勛率弁兵爲左拒。王萬化、林政邊士、偉、李祖、康陵率弁兵爲右拒。鄭耀祖、王紹緒爲後應。賊目翁飛虎率所部烏龍旂爲前鋒。驅車擁盾，炮火衝突。羣賊大隊並至。左右兩軍邊士、偉、呂瑞麟等大戰于二鯤身。藍廷珍親督大砲連環齊發，倒賊烏龍旂，破牛車陣。林秀、王良駿

朱文謝希賢胡璟林亮魏大猷蔡勇劉永貴各乘小舟。駕大砲附岸夾攻賊衆，大敗入水死者千餘人，斬獲殺傷不計。自是賊人退保府治，不敢再至。鯤身惟沿岸列砲晝夜固守。我軍分駕小舟追岸攻擊，與賊相持。有西港仔士民具羊酒到安平鎮叩迎。

王師

載家屬爲質，願引大兵從西港仔登岸殺賊。提督施世驃然之。庚戌夜密遣林亮魏大猷洪平董方以兵一千二百名往西港仔。次日藍廷珍知其事，急言示世驃曰：「謀算必出萬全，不可怙勝輕舉。」聞賊多在蕭

壠麻豆間西港仔，乃其肘下。且距府不遠，呼召立應。又多竹林可埋伏，彼若以數千人分佈要害，四面掩擊，亮等一軍危矣。世驃瞿然曰：「如何？」廷珍曰：「當用全力以大军繼之。」世驃曰：「誰當行者？」廷珍曰：「此非他人所能任，某不敢辭。」公當分遣將備於瀨口塗墜，處盡力擊賊。聞我師北來，必棄營遁府治，恢復在此。一二日間耳。辛亥初昏，藍廷珍留所部官兵三分之一會攻府治，率水師五千五百餘人夜向西港仔進發。翼日黎明在竿寮鄉登岸，令諸舟悉回安平。諸將曰：

登岸棄舟何也示軍士必死無還心今日戰勝明當直抵府治耳言未已謀者報賊在蘇厝甲與林亮魏大猷決勝勢甚張廷珍分兵八隊以魏天錫金作礪葉應龍武舉倪鴻範等率兵千人副林亮魏大猷洪平董方爲前鋒林政李祖兵千人爲左翼王萬化邊士偉兵千人爲右翼復以胡璟劉永貴范國斗范崇勛分千人爲左右奇兵蘇明良兵四百爲後應呂瑞麟兵七百爲遊兵廷珍親率陳允陞陳章林君鄉周宣藍宏沛何期有等領親丁精壯五百人爲中軍並

進賊目林曹江國論黃殿林騫林璉等率衆迎前鋒軍奮力衝殺左右兩翼奇兵繞賊陣後首尾夾擊遊兵突出竹林橫衝賊陣中軍燒闕殺進鎗砲震天賊大敗潰亂奔竄逃斬俘獲屍橫遍地薄暮至黎頭廷珍私料賊必夜劫營漏初下傳令撤帳房捲旗幟露刀伏芒蔗間賊果至不見大營大驚須臾我軍突出衝殺賊大敗奔散自是膽落不復有戰心矣癸丑廷珍督大兵南下復敗賊于木柵仔進至蔦松溪直搗臺郡朱一貴率羣賊數萬遁去廷珍收復府治出示

安尺駐劄 萬壽亭水師提督施世驃于先一日傳  
令水陸官兵并進遊擊林秀王良駿薄有成齊元輔  
郭祺王紹緒鄭耀祖守備鄭文祥千總游全與與張  
彥賢等十四員從七鯤身陸路至瀨口攻府治之南  
遊擊朱文謝希賢守備高得志蔡勇等分坐小船于  
鹽埕塗塹大井頭攻府治西角賊盡驅精銳拒戰  
我軍賈勇爭先遂奪塗塹燬賊營至晚屯南較塢  
癸丑與總鎮藍廷珍俱會府治萬姓歡呼復見天日  
戶戶設香案拜迎

王師廷珍一一慰撫之遣外委守備陳章飛船至廈赴總  
督覺羅滿軍前報捷乙卯提督施世驃登岸率大兵  
屯北較塢藍廷珍仍駐 萬壽宮據弁兵先後報獲  
殺害歐陽總兵之達家勇殺害副將之黃龍殺害羅  
參將之陳碧各付其子歐陽敏許方度羅世正等自  
行處死以報父仇凌遲剖肝碎屍揚骨聽從其便臺  
人決之閏六月朔日庚申陳章飛報捷至廈門總督  
滿保檄藍廷珍署理臺灣鎮總兵官事會巡撫呂猶  
龍繕疏以捷聞則施世驃在臺灣軍中已先自題奏

上達矣初臺灣警報于六月至京師

皇上惻然不忍加誅乃爲

諭曰諭臺兵衆據督臣滿保等所奏并伊等進摺家人所言臺灣百姓似有變動又奏稱滿保于五月初十日領兵起程等朕思汝等俱係內地之民非賊寇之比或因饑寒所迫或因不肖官員刻剝所致諭督保令其暫停進兵汝等若卽就撫自諒爾罪若執迷不悟則大兵圍勦俱成灰燼矣臺灣止一海島本地所產不敷所用祇賴閩省有錢糧養生前海賊佔踞六十

餘年猶且勦服不遺餘孽今匪類數人又何能爲諭旨到時將困迫情由訴明改惡爲正仍皆朕之赤子朕知此事非汝等本願必有不得已苦情意謂坐以待斃不如苟且偷生因而肆行擄掠其致此之罪俱皆不肖官員汝等俱係朕歷年參養良民朕不忍勦除故暫停進兵若總督提督總兵官統領大兵前往圍勦汝等其能支持此旨一到諒必就撫不得執迷不悟妄自取死特諭又

敕浙江將軍塔師拜以甲二千赴閩協防巡撫呂猶龍遣

按察使董永艾迎勞于浦城辦理夫船永艾素有才  
各方嚴不阿一路問民疾苦捐俸錢恤災傷多方撫  
慰故兵行而民不擾浙兵至閩欲宿借民居呂猶龍  
不可召兩司計議永艾曰靖亂以安民爲本若宿民  
居民不堪也命署福州府馮鹽分發諸佛寺居之于  
是浙兵駐閩者數萬得相安一無所苦

上諭至閩則六月二十有五也總督滿保檄委興泉道

陶範親賚

諭旨往臺灣安撫百姓併署理臺廈道事調汀州知府高

驛知臺灣府分委建寧通判孫魯往署臺灣府同知  
併臺灣知縣事海澄知縣劉光泗往署鳳山漳浦知  
縣汪紳文往署諸羅俱隨大兵安輯流亡慰撫各庄  
社民番伊時臺郡既平提督施世驃總兵官藍廷珍  
分遣大兵擴清南北二路以王萬化持政邊土偉魏  
天錫帶領官兵勦撫南路逃賊收復南路營鳳山擒  
賊目顏子京鄭定瑞等安撫下淡水大崑麓各處人  
民社番而南路五百里地方俱皆平復矣以林秀薄  
有成范國斗齊元輔郭祺胡璟李祖鄭文祥劉永貴

董方林石鄉及游全興帶同張彥賢等十四員往北  
路勦撫逸賊原任遊擊劉得紫先于王子夜乘間投  
大帥施世驃藍廷珍嘉其抗賊不屈優待之得紫募  
丁壯百五十人請殺賊報仇雪恥是行與焉既午賊  
敗于大穆降斬獲甚多賊黨降者十之九朱一貴率  
數千人走臺灣裡溪大軍追至茅塔尾鐵線橋將復  
鹽水港朱一貴走下加冬俸滿于總林君鄉率外委  
千總李佛等二十人先大軍二十里前行進殺賊奪  
牛車馬匹砲械與陳尚珍楊秀討議潛通張岳欲擒

朱一貴先謀去偽軍師王君彩殺之而漳浦人王仁  
和素往來溝尾庄與庄民楊石友善知其族楊旭楊  
雄等爲一方巨擘可與謀以言餌之石許爲仁和密  
告于藍廷珍廷珍給仁和外委守備併楊旭楊石楊  
雄等守備千總合銜劄令謀擒朱一貴後有蘇山黃  
遵爲李祖賚書與楊旭亦令計擒一貴于是楊旭與  
王仁和楊石楊雄陳尚珍楊秀等密糾溝尾前庄後  
庄小棟榔新牌佳走後潭等庄鄉壯以待閏六月五  
日甲子一貴率千人至溝尾庄柔飯食楊旭等椎牛



饗之許號召六庄鄉壯相助。一貴往眉潭乏食乙丑夜其黨散去六百餘人丙寅楊雄給一貴復回溝尾庄暮霖雨旭備館舍將一貴等分宿民家傳集六鄉社壯佯爲守護潛以水灌賊砲夜五鼓大譁稱官兵至金鼓火砲齊鳴諸賊倉皇驚起不知所措楊雄楊旭楊石王仁和等遂擒朱一貴王玉全翁飛虎張阿山等四人散其餘衆吳外除卽各率黨逸出旭縛一貴等置牛車趨入掌溪交遊擊林秀王仁和馳報藍廷珍廷珍令解赴施世驃軍前而自往會訊一貴尚

自尊大欲與提軍抗禮昂然而立廷珍至此之跪一貴猶妄稱孤家詞甚不遜廷珍怒搖其足于一貴及其黨皆跪伏罪請死乃檻送廈門聽總督覺羅滿保解京正法又有大排竹人民斬楊來首級獻楊秀秀亟至府等示藁街復據李秀等官兵李必第楊雄等鄉壯報獲吳外除印李勇等九犯解至軍前分遣朱文謝希賢呂瑞麟洪平及自澎召至之守備閻威以兵收復北路營諸羅縣擒斬賊目萬和尚等北路營千總陳徽把總鄭高率鄉兵來迎先是陳徽等于

六月丙辰起民兵攻復諸羅縣斬賊目賴元改頭祭  
羅參將將因

**王師**來縣治復爲翁飛虎江國論所奪仍入山至是乃盡  
招撫賊目曾賢李德隨朱文等安輯各庄社番民分  
遣汀州鎮中營遊擊景慧帶領官兵收復笨港又遣  
林亮魏大猷洪平以舟師赴笨港接應平定沿海  
上下而援淡之遊擊張駮守備李燕劉錫干總李郡淡  
水營守備陳策等引兵南下半線時朱文等已平諸  
羅謝希賢引兵壯上與張駮等合而北路千餘里地

方盡皆平復矣元兇既擒餘黨解散尚有當日倡謀  
渠魁僞稱國公如謝公英陳福壽劉國基江國論薛  
菊王忠陳成鄭文苑及君英三子杜會三等未獲總  
督滿保檄藍廷珍擒撫之重懸賞格遣弁目外委分  
途緝捕方一貴作亂時有下淡水客庄民人侯光惠  
李直三等建大清義民旗奉皇帝萬歲牌聯絡鄉壯  
拒賊一貴遣福壽劉國基薛菊王忠劉育等領賊衆  
數萬攻其庄六月十有九日巳酉侯觀德逆戰于淡  
水溪敗之陣斬劉育殺賊兵及迫入死者萬計屍骸

狼藉溪沙間陳福壽窮蹙目刎爲賊徒所救聞

王師已進安平五日乃遁八山劉國基薛菊王忠俱逃之  
郎嬌存匿至是外委陳章遣牒至郎嬌踪跡之國基  
等三人皆在章因與林尚蘇庚駕赴郎嬌招撫諭以  
國恩寬大邀與俱來三人皆首肯有提督差員某繼  
至責賊逆拜不加禮王忠聞之曰今如此到郡可知  
遂逃去章以劉國基薛菊見藍廷珍好言慰藉以恩  
禮加之七月癸丑江國論鄭元長等復聚餘黨藍旗  
于阿猴林藍廷珍發兵追勦羣賊已散繫旗林木中

國論元長逃北路其黨除逸謀于差員張騰霄騰霄  
偕逸往撫之乃與俱至廷珍爲之美衣服聽其出入  
遨遊而陰使人爲之備于是就撫諸賊皆忻然自慰  
曰江國論且然我曹無恙至六月捷報至京。朝廷  
先得施世驃奏大喜特授賚摺戴進官把總賜士驃東  
珠朝帽蟒袍黃帶異數有加又以淡水營守備陳策  
陞補臺灣鎮總兵官加左都督時臺中癘疾盛行行  
征將士冒炎威宿風露惡氣薰蒸水土不服疾病故  
者多參將林政王萬化遊擊許華先後俱歿于軍。八

月十有三日辛未。怪風暴雨屋瓦齊飛。風雨中流火條。竟夜燭海水驟漲。所泊臺港大小船擊碎殆盡。或飄而上之平陸。拔大樹。傾墻垣。萬姓哀號。無容身地。施世驃藍廷珍各終夜露立。風雨中。軍士蜂擁相攜。特不敢動。稍舉足則風颺顛仆。或裂膚破面流血。翼日霽。靜郡無完宅。壓溺死者數千人。浮屍蔽江。瓦角充路。署臺廈道陶範。府縣高鐸孫魯等躬歷民家。拊循流涕。發倉賑貸。瘞死扶傷。以風災飛報上聞。朝廷發帑金賜恤。殘黎始得更生。諸羅一縣。未被風災。

而餘孽楊君李明等聚黨劫掠藍水港。藍廷珍遣人緝捕悉擒之。又林君等煽誘奸民。豎旂千六。加甸俱爲知縣汪紳文所獲。并解至府。會同陶範高鐸孫魯等質訊。僉議押解內地。廷珍曰。甫平思亂。旣赦復叛。此曹不可活也。今解入內地。不能不牽累無辜。恐民間人人自危。且上下審駁。奏報往返。動隔經年。海外反側地無樹威不足。彈壓吾于就撫者。加之恩。擒者棄諸市。庶奸徒悚息可淨。盡根株耳。亟梟示衆。定民心。而固疆圉。有罪某自當之。軍中義得專殺。無預諸

君事也。皆曰諾。九月壬辰，梟楊君林君等爲首四人，竿視其次餘黨，分別杖斃，枷馘責逐過水。復有黃輝、卓敬在舊社紅毛寮聚謀爲亂，聲言羅漢門阿猴林有王忠等數千人接應，尅日攻府。藍廷珍發兵擒捕，搜獲偽劄與陶範、高鐸、孫魯等，會議輝與敬直承不諱，并斬之。陳章訪緝餘孽，復于南路觀音山招撫陳福壽。以來廷珍大喜，留福壽軍中，以家人禮待之。服食皆從厚。遠近賊徒聞風思歸，誠者益衆。杜君英久處山中，晝伏夜走，聞福壽就撫，頗心動。藍廷珍檄外

委守備施恩、陳祥以謀者。林生入羅漢門說之。君英恐見賣，欲得福壽面詢情實，卽與俱來。廷珍遣福壽施恩等往福壽尚病，載牛車以行。君英遂出。廷珍待以恩禮，一如福壽飲食居處遨遊，兩人不相離也。君英尚留其子杜會三未出。越三日，知乃父無恙，千總何勉往說之。會三就撫。蓋九月中旬，十數日間，陳福壽、杜君英、杜會三俱羅而致焉。提督施世驃自風災驚悸疾作，以九月望日癸卯卒于軍。藍廷珍奉檄署理提督印務。陶範、高鐸見君英等諸賊出，自由疑

日久有意外患言于廷珍曰此曹皆元兇大憝

下所

留意今報獲且暮必致京師朱一貫并鞫而公寬大至此倘逸去奈何廷珍曰極知此賊失一身家隨之但王忠陳成鄭文苑餘孽未盡不得不然二人視福壽君英等所居處與廷珍臥榻正隔窓櫺復謂曰行軍膽太夫矣推誠至處極耶萬一中夜有變將何及廷珍曰無傷也遲浹旬即送之厦陶範高鐸皆曰難矣公以撫為名待之心腹美衣豐食恣其宴游彼安肯舍而他之畏罪憚行作何措置留之則局不可了

有逃脫生變之憂抑之則將束縛驅迫駭人耳目又恐山中遊魂謂公從前皆偽廷珍曰有以處之十月甲戌呼杜君英等至幕中詰之曰頃接制府來書欲授若輩備弁令星速赴厦考驗天靈風和即日登舟可乎江國論不可廷珍罵曰汝貌輕福薄固知非有官者之相叱退之杜君英陳福壽許諾廷珍大喜賜金為贖遣左右送之行鼻婦人輿至幕中使乘向海岸登舟呼江國論鄭元長來國論等度不可違強諾請行亦賜贖鼻輿送之去繼呼杜會三至亦如之蓋

廷珍欲遣解諸賊預備三舟委自并在舟以俟自幕  
府至海濱分令親隨丁壯沿途徒倚密為防備順則  
善遣之行逆則幕內網手足閉輿中如婦人不動聲  
色市井皆無有知者君英等與順以行舟中亦善待  
之至厦總督滿保奉報奉

旨解

陳福壽杜君英會三赴京師與朱一貴對質朱一貴  
李勇吳外陳印王玉全翁飛虎張阿三俱凌遲處死  
親屬同坐陳福壽杜君英會三以就撫從寬斬于市  
其餘在軍前擒撫諸賊先後解到厦門如黃殿黃日

升郭國正劉國基林曹江國論林騫林璉陳正達朱  
蘆張看鄭惟晃鄭元長等總督滿保俱發臬司收禁  
福州府獄候審擬就地正法十有一日乙丑臺灣鎮  
總兵官陳策卒署提督藍廷珍移咨總督滿保檄金  
門鎮總兵官黃英之臺署事庚寅南路餘孽復叛為  
首荊瓜成即陳成蘇清揚美林阿美等集眾豎旗于  
石壁寮隨南路兵追勦癸巳黎明干把總何勉杜雄  
等率兵搗賊穴擒蘇清高三二名成等奔潰楊美王  
教逃匿下淡水知縣劉光泗擒獲之藍廷珍以羅漢

門諸山。去爲匪類。逃藪不大。舉搜捕掃清巖谷。無以淨盡根株。分遣遊擊王良駿。薄有成。守備呂瑞麟。率兵往角宿岡。刈蘭坡嶺。一路搜八羅漢門。守備閻威。由仁武庄土地公崎。阿猴林。一路守備李燕。蔡勇。由卓猴木庄岡社。一路已亥午刻。咸會羅漢門之中。埔庄別遣把總林立。陳雲奇。鄭榮才。游寬。往大武坑。分路堵截。無使賊竄。庚子深入。搜捕羅漢內門。諸將備分搜銀錠山。佳白寮。東方木南馬山等處。大武坑。諸弁目。搜礁巴。啤郎。包米。大龜佛。大湖等處。窮山密箐。

無不徧歷。焚燬賊巢數十所。凡二十七日。乃收軍回營。據搜山將備及差員外委蘇思維。陳祥。李爲勝。林福。石瑀。藍敦等。先後報獲。薊瓜。成卽。陳成。林阿美。林丁莊。謀林。讀林。齊鄭。教陳。璞等。而石璧寮再叛。諸孽盡行廓清矣。又據報獲。鄭文苑。林沙掌。兇死羣。卽。陳國正。龔昆。卽。林昆。滙仔。吳卽。李吳。洪迎。胡君用等。及臺廈道陶範。獲解。蕭彬。麻恩。金麻。猴卽。林玉等。而朱一貴案內。附和倡亂。諸賊悉俘。囚惟王忠。邱寶。宣未獲。遁逃。傀儡內山。臺灣山后。藍廷珍。分遣外委弁目。



諸路訪緝復令外委鄭國佐林天成召致山番通事章旺同八傀儡內山遍查各社諭番眾嗣後不許窩留復令鄭國佐往邱嬌繞行山后至卑南覓傳檄獎諭大土官文給以官帶補服賞勞之令起崇爻七十餘社壯番從山後大加搜捕將所有漢人逸賊盡縛以來于是王等不敢復入番界隻身竄伏束手待斃矣前此臺變遁回道府廳縣各文員朝旨令督臣提臣會審發往臺灣正法併已故知府王珍棺剖梟示眾武職周應龍等亦令督臣會同提臣嚴審定擬署

提臣尚未班師十有二月總督滿保在厦親審諸文員將原任臺道梁文煊同知王禮知縣吳觀域朱夔知府王珍屍柩委海澄營遊擊安奎賞令箭押送之臺十有八日甲戌決于市而臺灣縣丞馮迪與王定國諸羅縣典史張青遠俱羈臺灣縣獄候 部文秋後處決廣東提督姚堂奉

**旨調**

任福建水師提督藍廷珍遣遊擊王良駿賁印赴厦尅期班師總督滿保以地方初定檄廷珍以南澳鎮仍統征兵暫留在臺彈壓時建議臺鎮總兵官移設

澎湖臺灣府治設陸地副將裁去水師兩中營將備  
弁兵撤歸內地另補民間寢食不安宵小之徒訛言  
復肆康熙六十有一年春正月差員陳祥王仁和續  
獲韓淵林良等監廷珍念訛言搖惑會商陶範高鐸  
孫魯以逆賊蘇清等在獄多人久留未決恐不足震  
懾奸頑二月二十有九日甲申將蘇清林阿美王教  
林讀林丁莊謀林昆韓淵林良諸賊梟斬示衆李吳  
杖死楊美先一日病死陳成鄭文苑等劇賊十數人  
及譴獲之邱寶宣江邦俊悉解內地與王殿等俱禁

省獄候審擬歸案正法

朝廷以臺疆僻處天外民間疾苦無由上達

特命滿漢御史各一員歲奉差到臺巡視以南澳鎮總兵

官藍廷珍調鎮澎湖總督滿保疏薦督標中軍副將  
徐左柱調補臺灣陸路副將三月望日庚子南路下  
淡水奸民林亨等復謀作亂以合心王三字爲勘合  
頒于其黨方貿帛製旗欲夜舉事有密報者守備陳  
一得率官兵捕之擒林亨搜得勘合及偽劄供稱同  
謀爲首顏煙李咸陳法王帥王祿等分遣弁兵圍搜

大崑麓畧寮及北路鐵線橋諸處并獲之復有餘孽  
百餘人遁入諸羅后山小石門得寶等處夜出行劫  
藍廷珍密檄北路叅將朱文協防遊擊林秀發兵搜  
捕遣署守備李郡把總鄭高林時葉分三路并進復  
遣把總莊子俊蘇思維率兵往大武壠堵截絕其竄  
路夏四月戊午諸軍齊集會勦賊已先一夜遁至三  
林港焚汛殺傷兵丁奪商販小艇二入海逃生藍廷  
珍飛遣水師將弁出洋追捕聞報在內地青水壠劫  
坐商艇至銅山洋面又奪坐小魚艇料爲潮賊將散

縣登岸必于樟林東隴鴻溝澄海等處在三林多有  
帶傷又從朱一貴作亂時割截髮辮易于稽察星夜  
飛請總督滿保巡撫呂猶龍移檄粵東令潮州鎮道  
府縣密行查緝仍差千總一員赴潮催提盡獲劉國  
華邱阿路張舞賴日輝林阿元胡阿發黃阿赤黃阿  
五巫阿盛陳阿日等賊黨五十七名皆解閩審訊監  
候正法癸亥夜又有奸匪百餘人在入堂溪小溪洲  
拜旂作孽行至竹仔脚塘殺塘兵陳南王亘蘇天貴  
等三名比曉皆散回家爲民廷珍飛調將弁上下堵

截搜捕踪跡寂然。差員四路密訪，仍飭營縣廣差偵探。知縣汪紳文緝獲葉枕、廖猛、賴勤等，供指同謀聚眾羣賊，因遣兵搜捕北埔寮諸山千總李郡生、擒渠魁李慶奪賊旂械及所劫駐物，焚燬窩廬。又據叅將朱文知縣汪紳文守備劉錫干總何勉、陳章把總陳雲奇及外委弁目人等先後緝獲黃潛、蘇齊、張成、李延卿、張烏、鴨潮邊王妙何、歲張鎮、朱崑生等劇賊四十餘人，俱解內地收禁。福州府獄候審，擬分別正法。五月署臺灣府同知兼攝臺灣知縣事孫魯曾調補諸

羅縣知縣

欽差巡臺御史吳達禮黃叔璥至自京師。六月新授臺廈道陳大輦臺灣府同知楊毓健員外郎知臺灣縣事。周鍾瑄及副將徐左柱等俱先後抵臺視事。有奸民鄭仕者，綽號急燒疎，復訛言惑眾，招集亡命謀于六月乙卯夜監旂，不果。藍廷珍捕治之，得其黨蕭興、祖李柯等數人。甲戌并擒會訊，搜獲鄭樹家檔冊開列偽爵人數，一時旁觀多有駭愕。狀知縣周鍾瑄密白旂道當堂燒燬，將鄭仕等處死，人心大定。藍廷珍以

副將既至欲遵

旨赴澎湖劄百姓置囂罷市環

欽差御史道府廳縣各衙門顏呈請留時

新旨已下允提臣姚堂所奏副將仍設澎湖總兵官仍駐

臺灣水陸兩中營悉還舊制道標守備弁兵裁歸臺

灣鎮管轄設南北二路適中要害之處百姓欣欣以

手加額歡聲載道新調鳳山知縣靳樹畹抵任署縣

劉光泗仍歸海澄漳浦知縣汪紳文安撫緝捕事竣

仍歸漳浦靳樹畹抵任署縣染疫病未幾卒以同知

楊毓健攝鳳山縣事雍正元年春正月十有九日己

亥逸盜楊合復謀作亂驟聞

聖祖仁皇帝升遐未知

新天子卽位琬間思逞散劄招邀匪類謀犯郡邑藍廷珍

高鐸遣外委千總陳栩等擒獲之窮治其黨解散二

月

登極恩詔到臺萬姓舞蹈懽呼共慶太平士農商旅安

心樂業無窩匪接濟之人一二餘孽棲身靡所饑俄

待斃夏四月十有五日甲子千總何勉在南路鳳山

林提獲王忠劉富生陳邵等藍廷珍遣解內地聽總督滿保題正法朱一貴孽黨盡絕矣臺灣平

藍鼎元曰臺灣治亂之局迥出人情意計之外其地方數千餘其民數百萬其守土之官則文有道有府有縣令大小佐貳雜職若干員武有總兵參將副將遊擊守備大小弁目若干員其額名七千有奇糧儲器甲舟車足備又當

國家全盛金匱靡缺而朱一貴以餽鴨小夫歛焉倡亂不旬日間全郡陷沒此豈智能所及料歟太平日入

文恬武嬉兵有名而無人民逸居而無教官吏孳孳以為利藪沉湎樛蒲連宵達曙本實先撥賊未至而衆人已離雖欲無敗不可得已然鹿耳鯤身夙稱天險鄭氏一踞其間遂歷三世

國家圖之數十年費錢糧幾百千萬而後能收之今不動聲色七日恢復巨魁就擒孽徒授首即使孫吳復生亦未敢望功成若斯之速也良由

聖祖仁皇帝大德如天神威遠震將卒用命海若効靈是以摧陷廓清不勞而邊疆底定

諭旨遙頒白髮黃童無不感激流涕蓋至仁厚澤淪浹人心者深也諸臣或運籌帷幄出身疆場克敵致果功在社稷欲以鼓勵將來收千秋百歲用人之效則不得以其爲日無幾少之矣亂不久禍不深削平者之績不大此非君子之言也賞罰明則民易使今日之酬勲他年之龜鑑知此說者其知未雨綢繆之道乎臺灣海外險較內地更不可緩而此日之臺灣較十年二十年以前又更不可緩前此臺灣止府治百餘里鳳山諸羅皆毒惡瘴地今其邑者尚不敢至今則

南盡郎嬌北窮淡水雞籠以上千五百里人民趨若鶩焉前此大山之麓人莫敢近以爲野番嗜殺今則羣入深山雜耕番地雖殺不甚畏至傀儡內山臺灣山後塔仔難崇爰卑南覓等社亦有漢人敢至其地與之貿易生聚日繁漸廓漸遠雖厲禁不能使止也地大民稠則綢繆不可不密今郡地有水陸兵五千餘人足供調遣鳳山南路一營以四五百里山海奧區民番錯雜之所下淡水郎嬌盜賊出沒之地而委之一營八百九十名之兵固已難矣諸羅地方千餘

里淡水營守備僻處天未白八里盆以下尚八九百里下加冬笨港斗六門半線皆奸宄縱橫之區沿海口岸皆當防汛戍守近山一帶又有野番出沒以八九百里險阻叢雜之邊地而委之北路一營八百九十名之兵聚不足以及遠散不足以樹威此杞人所終夜憂思而不能寐者也臺民好爲盜賊不因饑寒方慶削平又圖復起去歲平臺大定之後尚有布散流言嘯聚巖谷復謀作亂者數次屢經撲滅歲餘始殄而王忠一賊伏匿深山至我

**皇**上印位乃克就縛可見地方廣大搜捕弗周雖平臺僅在七日而拔盡根抵東擒西勦亦有兩載艱難欲爲謀善後之策非添兵設官經營措置不可也以愚管見劃諸羅縣地而兩之于半線以上另設一縣官管轄六百里雖錢糧無多而合之番餉歲徵銀八九千兩草萊一闢貢賦日增數年間巍然大邑也半線縣治守備一營兵五百淡水八里盆設巡檢一員佐半線縣令之所不及羅漢門素爲賊藪于內門設千把總一員兵三百下淡水新園設守備一營兵百名耶



三臺系舉  
矯極南僻遠為逆盜竄伏之區亦設于總一員兵三百駐劄其地使千餘里幅員聲息相通又擇實心任事之員為臺民培元氣寇亂風災大兵大疫而後民之憔悴極矣然土沃而出產多但勿加之刻剝二三年可復其故惟化導整齊之均賦役平獄訟設義學興教化獎孝弟力田之彥行保甲民兵之法聽開墾以盡地力建城池以資守禦此亦尋常設施耳而以實心行實政自覺月異而歲不同一年而民氣可靜二年而疆禦可固三年而禮讓具興而生番化為熟

番熟番化為人民而全臺不久安長治吾不信也顧或謂臺灣海水不宜闢地聚民是亦有說但今民人已數百萬不能盡驅回籍必當因其勢而利導約束之使歸善良則多多益善從來疆域既開有日闢無日蹙氣運使然即使委而棄之必有從而取之如澎湖南鎮皆為海外荒陬明初江夏侯周德興皆嘗遷其民而虛其地其後皆為賊窠閩廣罷敝及設兵戍守迄今皆為重鎮臺灣古無人知明中葉乃知之而島夷盜賊後先竊踞至為邊患比設郡縣遂成樂郊

由此觀之可見有地不可無人經營疆里則爲戶口  
首賦之區廢置空虛則爲盜賊禍亂之階臺灣山高  
土肥最利墾闢之所在人所必趨不歸之民則歸之  
番歸之賊即使內賊不生野番不作又恐寇自外來  
將有日本荷蘭之患不可不早爲綢繆者也聞居無  
事燕雀處堂一旦事來噬臍何及前轍未遠可不爲  
寒心哉殉難諸臣雖功過不一然大節炳然足以增  
光宇宙褒其後而畧其先崇獎義烈用慰忠魂亦因  
以爲鑒可也

臺自奸民起釁以及平定安集中間事蹟繁多  
千頭萬緒欲以一篇文字網羅而條貫之非有  
浩然剛大之氣排山倒海之力剗犀斷蛟之筆  
未有不有理亂絲或附贅懸疣顧此失彼者也  
茲紀一氣呵成絕大神力敘亂之所由生至纖  
至微止在職守恬熙便開出無窮禍變可見凡  
有地方責任之君子當兢兢業業無事常如有  
事之防不可以未雨綢繆爲迂也岡山初起賊  
勢未盛不論中材將弁疾趨使可撲滅偏遣一

龐然無用之周應龍玩寇殃民養成賊亂日行  
五里十五里稍勝收兵方戰遽退等情形不但  
寫出豚龍見虎醜態萬狀亦見離郡咫尺鎮道  
奚罔聞知並不急遣能員將兵往換以致赤山  
敗坳賊遂長驅入郡此又用人不恤泄沓成風  
之過也金甌雄郡無論陷沒此時當事成何光  
景幸有陣亡殉難如許李游羅諸公凜凜生氣  
至今猶存令讀者心神飛舞為謫地維賴以立  
天柱賴以尊之句彼抱頭鼠竄縮頸蚓蛭能不

愧死無地乎補入高永壽兵爭軼事追延從前  
鎮道疎忽全不以封疆為意是以賊起浹旬縣  
府繼陷稱孤道寡妄希封拜直書弗削以見纍  
纍肉食誰生厲階蓋傷之也不死不逃能全臣  
節如遊擊劉得紫尚猶有惻忍羞惡之心故亦  
許之若林亮之獨排眾議保守澎湖則諸將中  
第一出色寫得有聲有光鬚眉俱動使斯人早  
在臺灣必無棄地奔逃之事而用斯人以敵則  
又何敵之不摧是澎湖一守扼住臺灣門戶併

收復臺灣之先鋒亦在其中此文字一大樞軸也滿督赴廈督師深得控制機宜一切調度俱臻絕頂肅兵安民于勘亂功已過半讀者于怒髮衝冠之餘忽覩此景星慶雲出現不覺心中爲之一慰大帥出師軍威雄壯不殺二字使反側子自安尤爲平臺第一機括鹿耳安平鯤西港數大戰寫得如火如荼五花八門變化入妙不啻親提柁鼓目覩垓下昆陽飛戈鳴鏑時也府治旣收罪首就擒平定南北三路如風捲

籬溝尾庄下淡水義民功不可沒而一二附和倡亂同黨渠魁亦必陸續擒撫方得根株淨盡中間插出癘疾風災慘苦異常見得臺民喜亂戾氣薰蒸即使

國法可寬天道亦不肯宥可爲大戒乃尚有甫平思亂旣赦復叛之奸民則雖欲不殺豈可得乎鹽水港六加甸舊社紅毛寮石壁寮下淡水三林竹仔脚再叛諸孽一一正法臺民亦可以恍然悔悟不敢復萌非分之想矣通篇大意在儆

勵地方文武當刻刻以吏治民生爲念使盜賊無自而興若稍一玩愒便功名自家性命靡不隨之且費後人許多區畫此居官者之不可不慎也愚人作賊不過惡想妄行朱一貴聚黨數十萬不爲不多陷府殺官劫庫僭號不爲不橫然屈指幾日梟首碎屍誅及親屬數十萬黨俱歸何處卽後此再叛如楊君林君等八九案無一不竿視藁街作賊果何益乎所以做凡爲民者皆當起忠孝仁讓之心卽消其犯上作亂之

意官民交勉則海甸昫昫常保寧謐子孫世世俱享昇平此作平臺紀畧者之意也大書特書正敘側敘補敘插敘分敘合敘錯綜變化矯如游龍至其陡然而起絀然而止遙接遙應飛渡暗渡筆筆有神一篇萬五六千言讀之惟恐其盡不復有冗長漫衍之嘆知其浸淫于史漢者深矣總論鑒前車籌未雨措置設施絕大經濟則又當于長沙中壘間求之有此關世道之文非腐生所可與議也

雲錦少多病舞象後三年不讀書深自懼其弗  
成材也族有過者誚之曰此所謂今人一服儒  
衣反奄奄欲絕矣子之病在安坐偃臥未嘗一  
勞力是以筋骨解散血氣不行今試習拳械練  
手足日出汗數升非惟不病且雄壯焉如其言  
果稍健因窮弄刀盾飛礮彊彎弓走馬以爲樂  
家君固見其弗成材也亦聽之康熙六十年  
夏五月聞報臺灣朱一貴作亂先伯父忠毅  
公統師征臺念軍中無與謀畫者時幕友陳

少林先生已應制府滿公聘他人畏風濤干戈  
莫敢往遂以家君行雲錦從焉襄毅公笑  
謂曰養軍中千日用在一朝汝病三載遂成健  
兒亦爲一朝用也雲錦時年十有九歲持戟立  
樓船乘風破浪覺甚壯迨一鼓入鹿耳門又一  
鼓收安平鎮鯤身數戰奮勇爭先目覩巨砲雷  
轟鳴鏑從耳邊飛過亦習爲故常不復知紛紛  
者何物矣七日之內府治收復如疾風之掃秋  
穽亦似有一番佳趣嘆古人年少請纓大都如

此

聖皇在上仁育義正凡有血氣者莫不尊親豈容小醜不共逃于光天化日之外

天戈所指罪人魄喪何蠕動之敢不伏辜也事定旋歸迴憶執兵徵逐竟成卒伍粗鄙面目何堪使君子觀之始愧勵發憤欲讀書 家君命偕諸弟從師受業數年以來蹉跎作輟至今碌碌無所成少時不勉悔何及矣平臺紀畧乃 家君還鄉時所著者 家君叅贊謀畫公檄文詞具

載東征一集茲編特記小醜起滅蕩滌安平事蹟而已 家君身在行間指揮跋涉 襄毅公欲上其功 家君不可蓋當時尚應制舉不欲以書生廁名勳籍今紀畧亦置身事外弗以姓名勞績夾敘其間雖自審位置不爭此區區一日之長亦以示至公無私垂爲信史也是書風行海內已十餘年雍正十年 家君客廣州焉 執友 天長王先生同事筆硯 先生以板文漫漶爲加評點再付梓人雲錦趨庭在粵助家

平臺系畧

君校讎且識數語于後因薰沐百拜而書之  
雍正十年秋八月乙卯朔長男雲錦謹識



